

Ч. 12. (96.)

Крыница, четверг дня 26. марта (13.) 1936.

Рок III.



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателів, котрі не ввели ще пренумерату, просимо вирівняти якнайскорше рахунки.

Пренумерата в краю:  
30 грошей місячно,  
80 „ квартално  
1.50 „ полрочно,  
3 зл. рочно.

В Америкі: 1 дол. рочно.

В Чехословаччині:  
2 кор. місячно, 10 кор. полрочно,  
20 кор. рочно.

Ціни оголошень:  
Ціла сторона 120 зл.,  $\frac{1}{2}$  сторони 60 зл.,  $\frac{1}{4}$  сторони 35 зл.,  $\frac{1}{8}$  стор. 20 зл.,  $\frac{1}{16}$  стор. 10 зл.; оголошення мали за 1 мм. 20 гр., в тексті 30 гр., перед текстом 40 гр. При місячному і довшому оголошенню значна знижка.

Конто чековє Нр. 404.155.

## День памяти Великого Вождя Народа.

День 19. марта признано в Польщі святом. Свято того обходимо в память Великого Вождя Польского Народа, бл. п. Маршала Осифа Пилсудского. В том році во всіх святынях великой Державы отслужено богослужения и устроено по школах академии. Святу тому не надано однак жалобного характера, лем признано его святом сосредоточения и молитвы, бо тот день єст переназначеный на пригаданє собі трудолюбивого и полного великих подвигов житя бл. п. Маршала. Пригаданє ся над Его житєм повинно быти для всіх нас доропоказателем и заохотити, всіх до вытравалого труда для выкутя лучшей будучности. Дух того Великого Мужа, котрый ціле своє житє борол ся за свободу, не жадат от нас напевно ограничения наших народных и культуральных прав, он жадат лем, шобы мы во всіх проявах народного житя мали на ціли добро нашего Народа и добро нашей Державы и шобы мы не уставали в вытравалой роботі для того добра.

тіла с палаты высказал О. Ядловский, почетный крылошанин и советник консыстории Ап. Адм., котрый в коротких и теплых словах высказал жаль по утраті першого лемковского Владыкы, котрому передвчасна смерть не позволила перевести начатого великого діла соединити религиозно розлучене чадо. От имени Ставропигийского Института попрощал покойного Сениор Др. Антоний Гулла, котрого бесіду подаєме точно на другом місци. Похоронный кондукт направил ся до церкви в Дошні, где отслужено панихиду, по котрой перевезено тіло пок. Ап. Администратора до его родинного села Новой-Веси в пов. ного-сандецком,

В понеділок рано о год. 9-ой начали ся в Новой-Веси похоронны торжества, котры тревали до год. 3-ой по полудни. В похоронах приняли участь численне священство обох обрядов, делегаты державных и войсковых властей, делегаты русских центральных и місцевых обществ, учительство с доокрестных школ, много школьных дітей и численны толпы народа. Латинский епископ с Тарнова, Ексцеленция Д-р Лисовский в товаристві делегата Его Еминенции Примаса, пралата Бржозовского и численно собраного лат. клира отслужил „екзеквию”, по котрых наше священство начало правити похоронны молитвы. О год. 11-ой приїхал перемыский епископ Ексцеленция Коцыловский, котрый отслужил соборну архиєрейску Службу Богу. В церкви попрощал пок. Ап. Администратора О. Фенич, парох с Войковы, а надгробне слово высказал О. Евгений Хиляк из Крыницы. В коротких, теплых словах попрощал он своего Владыку и товарища с лавкы школьной и поблагодарил всіх, принявших участь в похоронном торжестві. От имени Лемко-Союза попрощал пок. Владыку председатель того Т-ва Д-р Орест Гнатышак. Тылицкий оркестр отограл „Вічну память” и „Со святыми” и смутне торжество окончило ся. Опечаленный горем народ подходил ку открытой могилі и послідным взглядом и щиром молитвом прашал своего першого Лемковского Владыку.

Бесіда сениора Ставроп. Инст. д-ра А. Гуллы, высказана на похороні бл. п. Ап. Администратора.

Горем прибитый Народе!

Апостольский Администратор Лемковщины, О. Др. Василий Масцюх закончил свой земский путь и отошел от нас раз на всегда.

Яко сениор Ставропигийского Института, найстаршого церковного братства на наших землях приходит ся мені схилити перед свіжом могилом низко голову, бо то был человек, на котрого звертали ся очи цілой, по рускы думающей, части населения Галицкой Руси!

На дуже тяжком и отвітственном посту он пробыл лем оден рок и прото трудно вымагати от Него якихси великих подвигов и успіхов. Одночасно однак не даст ся заперечити, што Покойный взял на свои плечи тягар не маловажный с молодечим порывом, будучи свято переконанным, што лем он, уроженец Лемковщины зможе принести своему народу велику услугу. Именно перед том горячем віром О. Д-ра Масцюха належит преклонити наши чела, бо лем така віра, як Его свідчит о великости творчого духа.

Правда, пок. Ап. Администратор оставил по собі ледви што надпочате діло, но треба подчеркнути, што его служба была до послідного краю житя подумана в якнайдеальнійших намірах.

И если Ему не удало ся заорати и обсіяти поле, котре передано Ему до обробления, то стало ся так для того, што положеный на него труд был понад силы одного человека. Потвердит того объективна, безпристрастная история, што о. Д-р Масцюх борол ся с надмірно утяжливима трудностями, яким принес в жертву свое житє.

А може неналежит так говорити, бо Всемогущий Господь знає, што творит от краю до краю вселенной с небес на землю

## Похорон бл. п. Апостольского Администратора.

Похорон бл. п. Апостольского Администратора О. Д-ра Василия Масцюха отбыл ся величаво. Дня 15. марта от рана приїзджали до Рыманова численны автомобили, с котрых высідали высокы достойники Церкви и Державы. В торжестві экспортации тіла приняли участь епископы лат. и гр. обряда и делегаты всіх министерств и войска. Пращальну бесіду при выносі



простырає ся Его свята воля. Всьо, што находить ся под сонцом и выше Его, розносит в світі и за світами Его безначальну и безконечну мудрость и перед нѣм являють ся наше розумованє, як капля перед морем, як червачок перед велитом, як маленька хвилина перед вічностью. Если то так, то нехай буде Его воля свята!

Як нам не тяжко и смутно, мы мусиме погодити ся со стратом человека такой міры яким был О. Д-р. Масцюх, лишивши по собі много вартостей и слѣдованя в области церковного права, любивший свой родный, лемковский поток любовью родного сына и посвятивший свои силы и знаня организации повѣреного Ему св. Отцом, Папом Римским и высоким Правительством Р. П. діла лемковской администрации.

Нехай же тоты великы заслуги неотомимого труженника в Христовом виноградѣ удалят всі Его недостатки (если они были) с нашей памяти и утвердят в ней мужа полного посвяченя для добра своей Церкви и своего русского Народа!



#### Функции Апостольского Администратора сполняют крылошанин О. Иоанн Полянский.

Церковны власти поручили веденє діл Апостольской Администрации для Лемковщины почет. крылошанину О. Иоанну Полянскому и надали ему полны права Апостольского Администратора.

Лемковске населенє приняло тоту номинацию с нескрываном радостью и вдячным сердцем для верховных церковных и державных властей.

## С войны италиянско-абиссинской.

Положенє на африканских фронтах, по розбитю абиссинской армии на полномочном фронтѣ, не змінило ся. Италияны поволи, але систематично идут вперед.

Негус позберал послѣдны отділы своих войск и выршил на полномочный фронт, чтобы противоставити ся италиянским силам. Ест однак мала надія, чтобы тоты силы могли дати належный отпор. Абиссинскы достойники радят негусови, чтобы уступил с престола на користь своего сына и чтобы судьбу Абиссинии передати в руки Англии и Лиги Народов. Негус не хоче згодити ся на то, заявляючи, же в имя историчной правды треба с Италиянами расправити ся с оружием в руках. Така расправа однак ест тепер для негуса барс трудна.

Незнати, што принесет будущность, але всьо показує на то, же зближає ся скоро до оконченя италиянско-абиссинской войны.



## Гаракири.

Послѣднa внутренна японска революта звернула увагу всіх на Японию, край полный тайн и дивных обичаев. До таких чудачных обичаев належит гаракири, або способ пополнения самоубийства.

Японцы, иарод рыцарский и цѣнячий высоко честь, уважают, же лем таком смертѣю можна окупити каждую хыбу в виду улюбленого цисара и чести.

Гаракири, зване в Япоии сепуку, полягат, як уж сама назва показує (haga-брюх, кири-край) на перерѣзаню собі брюха и выпущеню элит. Смерть приходит в послѣдство утраты кырви и перерѣзаня внутренностей. Смерти товаришат невысказана боль. Смерть приходит нераз аж по килькох годинах.

Самоубийство пополняют ся коротким мечом „вакизами“, бо каждый японец достает от отца два мечи, оден долгый, котрый служит до бою с врагом и другой короткий о широком острую до нанесеня собі смерти.

Человѣкови, котрый пополнил гаракири, не вольно приходит с помочом.



## Катастрофальне наводненє на Литві.

С Ковна, столицы Литвы, доносят, же уровень воды на Немнѣ под Ковном повысшил 7 метров и Ковно ест окружене со всіх сторон водом Немна и Вилии, котры в самой серединѣ міста получили свои корыта так, же ратуш и катедра находят ся на островѣ. Таксамо загроженный ест театр.

Вода залаяла в Ковнѣ 54 улиц и 730 домов. Около 10.000 людей остало без даху и втратило цѣлый свой маєток. Закрыто фабрики и около 10.000 работников остало без работы. Также великы шкоды вырядила вода в селах положеных недалеко Ковна. В одной Нарвинцѣ втратило понад тысяч людей свои дома.

Причином наводненя ест нагроможденє ся ледов на ріцѣ Немен понизше Ковна, котрых не можна усунути ани через розсаженє динамитом, ани другими способами.

## Мысли о прошлом и теперешном.

(Продолженє)

Акція украинизации церкви ведена на теренѣ трох епархий ишла в двох направлєнях, а именно, чтобы уничтожити и в коренѣ истребити всьо, што руске, а с другой стороны, чтобы давний историчный характер и облик церковного житя так в области языковой як и артыстично-стилевой ународнити.

Медже иным вышмарено из текста церковных богослужень слова поминаня о православных христианах и о православной вірі, помимо, што текст старославянских богослужебных книг был затвержденый римским престолом и не лем поодыноки священники але и епископы, каждый окремо и всі разом, не мали права самовольно текста того зміняти, а мог то зроби́ти лем церковный собор.

Епископы проголосили силом своей власти приказ, чтобы рускы подлегли им священники не смѣли в своей общественной дѣятельности противоставити ся украинским переконаням и стремлєням их прихожан и то под угрозом суспензии. Выходило аджек на ділі таке, што священникам-украинцам было всьо дозволено, они могли политыковати в церкви и поза церковом, могли ширити украинску агитацию не лем в своей парохии, але и в селах русских, могли свободно агитовати в селах, где парохом был священник руский, а рускому священникови не вольно было противоставити ся политичной агитации найменьшого украинского дурачка, бо за то грозила священнику суспензия. И таку засаду видиме на каждом кроці.

Украинскы священники аранжуют церковно-патриотичны торжества, ставят памятковы кресты по украинских січовых стрѣльцах, правлят панихиды по случаю различных памятных дней и по померших своих подвижниках не выключаячи православных (Мих. Грушевский, Николай Скрыпник) а нам не хотят посвятити и талергофского креста.

А если котрый из епископов и позволил посвятити крест в память талергофских мучеников, то поручал священнику, чтобы то робил в будный день и без розголоса.

В поодыноких церквах шал украинского шовинизма доходит до того, што не лем співають там украинскы свѣтскы гимны, але тых, котры не хотѣли того слухати и из церкви выходили,

банда организованных украинских посіпак была в церкви за то, што не хотят выслуhati співу украинского гимна. И всьо то діяло ся за відомостью пароха-украинца под боком митрополита графа Шептыцкого, а медже иным и в церкви русского Ставропигийского братства во Львовѣ.

Веце безличия, нахальства и варварства трудно собі вообразити. Ту выходит на яв вся бездна злобы украинской толпы, всі хамскы черты украинской души, котра сильна лем чувством ненависти до вьсого што не украинске.

Сукраинизована униятска церков не забывает и о украинских „героях“, котры подпалали, рабовали а также подступно и потайно людей мордовали.

Коли мают казнити Біласа и Данилишина, пралат Куницкий в церкви св. Юра досвіта правит торжественну панихиду за упокой души казнєных, на котрой участвує численно украинска школьна молодеж.

Аж коли такой сам герой замордовал дыректора львовск й гимназии, Бабию и сам также помер, положенє нагло змінят ся. Не правлят торжественных панихид за „героев“ украинской войсковой организации, але украинске духовенство торжественно хоронит жертву убийства, то значит покойного Дыр. Бабию а сам епископ Бучко держит надгробне слово.

Мало того. Митрополит граф Шептыцкий пише пастырске посланє до всіх вірных, в котром в острых словах порыцат дѣятельность украинской войсковой организации.

Што властиво стало ся? Длячого раньше украинскы пралаты и священники так щиро молили ся за души тых, котры палили, рабовали и подступно мордовали невинны жертвы, а в послѣднем случаю молили ся за невинну жертву, а не за убийцу?

Длячого передом, коли замордовали куратора Собинского, посла Голувку, министра Перацкого и иных, митрополит граф Шептыцкий упорно молчал и аж по убийствѣ дыректора Бабию проговорил?

Річ ясна длячого. Там рабовали и мордовали поляков, тож из украинской точки зрѣня чинили добре и длятого сукраинизована церков униятска молила ся за убийцу, а в послѣднем случаю замордовано украинца, и длятого церков украинска молила ся за замордованого.

(Продолженє в слѣд. числѣ).



## Ярины в домашнем господарстві.

Населенє на селі іст назагал зле. Причином того єст с одной стороны біда, а с другой также и того, же людє не уміют с того, што мають, прирядити смачны, здоровы и поживны стравы и плекают на своих господарствах мало ярин, котры дали бы нам добрый и здоровый корм.

Над том справом вартат ся призадумати, бо ґрунту под ярины не бракує, насінє ярин можна всяди купити, а однак держиме ся упорно все лем одних, не глядаючи жадной новой ярины. Часто на питање, чом варит ся лем капусту, бандуры и буракы, одержує ся отвіт: „оно так уж людє привыкли и других ярин не сіют“.

А однак кромі тых ярин єст ище много инших, як морков, калярепа, каляфиоры, огуркы, помидоры, салата, горошкы, физола и т. д., сут также ріжны отмінны капуста, котры треба доконче у себе плекати, бо втотчас можна буде дешево и добре жити.

Маючи до распорядимости много ярин, от вчасных до совсем поздных буде мати газдыня все „што вложити в горнец“ и маючи кухарску книжку, може все прирядити шторааз инший здоровый обід.

Особенно велику вартость представляют вчасны ярины, котры можна и добре продати, а также мати в дома здоровый корм в наитяжшом часі предновка.

Выплеканє вчасных ярин не єст трудне, але потребує знаня и тому треба купити собі недорогой порадник, в котром найде каждый потребны рады, яке выберати насінє, як обрабяти землю и што по чом сіяти, штобы с одной грядкы можна одержати пару ярин. Поступаючи таким способом можна мати все свіжи и здоровы ярины. Само плеканє ярин не представят великой трудности, найтруднїше єст обдумати, што, где и коли посіяти, або посадити.

В загороді мусит находити ся бочка на воду, с котрой огріта сонцом вода буде нам служити до поливання молодых рослин. В куті треба vybrати місце и заложити компост, а на добре насвітленом и заслоненем от вітров місци треба заложити розсадник. Сіючи, або садячи рослины, треба так манипулювати, штобы на місце одних сейчас садити другы, н. пр. береги грядок можна засіяти салатом, коли с иншого берега вырвеме редьковку, то розсада салаты уж буде готова до пересадження.

По зеленом горошку, який збераме уж в початках червня, можна сіяти ище кукурдузу (треба додати гною) и т. д.

Так поступаючи, можна мати все свіжи ярины, котры дадут нам возможность осягнути с наших господарств высши доходы и улучшат наш корм.



### УМЕР ВЕНИЗЕЛОС.

Дня 18. марта о год. 8:50 умер в Парижі найбільший политык Греции Елевтериос Венизелос.

Венизелос уродил ся 23. серпня 1864 р. на Крети. Правничу науку окончил в Афинах. Политычну карьеру начал в 1887 р. стаючи ся активным членом руху, маючого на ціли освобожденє Креты с под панования турецкого. Бере участь в возстаню в р. 1897.

В р. 1910 выбрано єго до атенского пар-

лямента а по уступленю Драгумиса творит он свой кабинет, котрый удержал ся через цілый час балканской войны.

В часі світової войны Венизелос был знова у власти и станул по стороні антанты. По войні репрезентовал Грецию на мирных конференциях. Яко республиканец мусит он килька раз выїзджати с родной землі и жити на эмиграции в Парижі. Вертат однак все по якомси часі и обнимат власть в свои руки. Так был он 7 раз председателем рады министров. В р. 1934. вертат на Крети и веде оппозиційну роботу. По возстаню в р. 1935 эмигрує знова до Франции и єст заочно засужденый на кару смерти.

На єго житє роблено 2 раз замах. В р. 1920 стріляли до него в Парижі два грецкы офицеры морскы, а в р. 1933. в часі револьверового замаху на єго житє ранено єго жену. Венизелос в обох случаях вышол ціло.

Покойный был одним с найспособнїших политыков новой Греции. Греция увеличилась за него територияльно. В политыці заграничной єго роля была также барз велика. Был он одним с найактивнїших участников всіх важных межденародных повоенных конференций, што выробило єму світовый розголос и опинию великого европейского мужа.



### ВЕЛИКИЙ ПРОЦЕС В СОСНОВЦИ.

Дня 16. марта начал ся в Сосновци великий процес. На лаві обжалованных засіл Павел Гржешольский, котрому акт обжалования зашмарят отруте жены и двое дітей. Процес будит велике заинтересованє, бо єст опертый лем на подозріах, а нїт в нем нияких доказанных и незбитых фактов преступленя. Процес операт ся на словах сестры покойной жены Гржешольского, Кучальской, котра обтяжат сильно оскарженного. Але оскарженный боронит ся тым, же Кучальска хоче ся на нем помстити за того, же он по смерти жены не хотіл ся с ньом оженити. Слуханы в том процесі лікары свідчат неодинаково, одны допускают отруте, другы выключают єго совсем. Положенє суда єст барз трудне и тому суд допускает всі возможны материялы, котры могли бы ся причинити до высвітлення того неясного процесса.



### ДАЛЬШИ СОБЫТЯ ПО ВКРОЧЕНЮ НІМЕЦКЫХ ВОЙСК ДО ПРИРЕНСКОЙ ОБЛАСТИ.

В попередном числі подано уж, же Гитлер приказал вкочити своим войскам до демилитаризованой Приренской области и тым самым нарушил всі дотеперешны договоры с Франциом. Нич дивного, же в першой хвилі здавало ся, же потягне того за собом войну в Европі. Але войну памятают ище всі и никто єй не хоче. Прото, штобы ратовати якоси „гонор“ Франции и не допустити до войны, скликано до Лондона на конференцию представителей всіх великих держав, котры маот найти способы мирного уладження того конфликта. На той конференции зажадала Франция, штобы німецкого делега не допустити так долго на нарады, покаль Німеччина не выцофат свои войска с Приренской области, однак Гитлер не по того приказал им там ити. Зрештом и Англия не барз остро выступат против Германии и до-

била ся того, же представитель Німеччины прийме участь в нарадах.

### ФРАНЦИЯ ПОСТАВИЛА ТЕПЕР НОВЫ УСЛОВИЯ,

котры сформуловано в слідуючий способ:

1) Трибунал Гаскый має рішити, ци пакт француско-совітский не нарушат пакта в Льюкарно. Если рішит, же не нарушат, то Німеччина має выцофати свои войска с Приренского края.

2) На час процесса перед Трибуналом Німеччина собовяже ся уменьшити войска в Приренском краю и не будовати укріплень.

3) Если Німеччина не признат засуда в Гагі, має ся примінити в виду них карательны санкции господарчи.

4) В таком случае Англия має подати новы условия гваранции безопасности для Франции и Бельгии.

Ци Німеччина згодит ся на всі тоты условия, або хоц лем на их часть, не знати, але Англия добила ся одного, именно же Франция и Германия засядут при одном столі.

### СОВІТЫ АТАКУЮТ НІМЕЧЧИНУ.

Не ждучи на приїзд представителя Німеччины Рада уж 18. марта приступила до дыскусии на скаргом Франции.

Загальну увагу звернула на себе бесіда Литвинова, котрый барз сильно атаковал Гитлера и єго народный социализм. Литвинов в своєй бесіді заявил, же Німеччина хоче розділити Европу на 2 або и больше частей в той ціли, штобы гварантуючи одной стороні неагрессию, захвачал землі у других. Литвинов сказал, што он выступит против принятю Німеччины до Лиги Народов, бо уважат, же Гитлер угрожат мирови Европы.

### ШТО БУДЕ ДАЛЬШЕ.

Напевно западе ухвала, же Гитлер нарушил трактат в Льюкарно. В том случае Англия и Италия маот прити с помочом Франции и Бельгии, але того буде лем в теории, бо в практыці Англия. не понаглат ся с уділенєм такой помочи. Войны не хоче никто, знає о том Гитлер и тому бере, што ся даст.]



### УКРАИНСКЕ „БОГОРОДИЦЕ ДІВО“.

Богородицьо Діво радуй ся, радуй  
І часто нас вікраїнців згадуй!  
Бо чи-ж шани Ти мало зазнала,  
Що в Шевченкові твори попала.  
Він прецінь о Тобі памятав  
І в своїх писаннях Тебе величав,  
Що Ти стала вірцьом жінки  
Для каждой вікраїнки.

Подслухал Ваньо Сокрыка.



ПОМІЩАЙТЕ  
**ОГОЛОШЕНЯ**  
В ГАЗЕТІ „ЛЕМКО“



## Што чути в світі.

**Париж:** Сенат французский ухвалил вотум довіря для правительства и ратыфікуцію пакта французско-совітского 226-ома голосами, против 48-ох. Пакт тот обов'язує во Франції от 18 марта т. р.

**Льондон:** В часі дискусії в англицком парламента над бюджетом морских сил оден посол сын знаного адмирала виявил, же Англія має отвітне оружје до борби с подводными лодками. Если подводна лодка наблизит ся до корабля, то найде ся она в пространстві дійствия таких лучей, котры ю безотложно знищат.

**Москва:** Знаний писатель Максим Горький єст поважно хворый на сухоты. Лікары приміняють окись.

**Обсада Приренской области** німецькими войсками занепокоїла также Голяндию, котра укріпляет свои оружны силы. Заряджено задержати при войску рочник, котрый мал быти тепер роспущеный.

**Льондон:** Французский министр заграничных діл Флянден на засіданю Лиги Народов, котра собрала ся тепер в Лондоні, загрозил, же если Лига Народов не увзгляднит жадань Франції и Німеччина не уменьшит своих войск в Приренской области, то он выйде безотложно с Лондона и уговорит своє правительство выдати декрет о загальній мобилизації.

**Льондон:** В Лондоні кружат поголоскы, же ангельский король Едвард VIII. має ся в коротком часі оженити с грецком княжном Евгением. Вість тотя росошла ся на основі писма, яке король переслал англицкому парламента, штобы занял ся всіма ділами, относячима ся до евентуального королевского вінчаня.

**Париж:** Ведля абисынских информаций иде великий бой недалеко Амба-Аляджи под начальством самого негуса. Втраты по обох сторонах сут великы.

**Штокгольм.** Оден адвокат, котрому заборонено выступати в суді, вдер ся на судову салью и дал 12 стрілов до членов трибунала. Прокуратор и оден свідок (роботник) были убиты на місци, килькох членов трибунала кулі ранили. Адвокат пополнил самоубийство.

**Льондон:** Ангельска газета „Daily Telegraph“ подає, же совітска Росія має тепер найбільше на світі число подводных лодей, а именно 96 одыниц. Франція має подводных лодок 92, Америка 90, Англія 69, Німеччина 28.

**Льондон:** В ночи на 17. марта до будынка адмираліції достали ся злодіи, котры вдерли ся до той части будынка, где находят ся бюро марынаркы и фотографична салья. Подозрівають, же злодіи хэтили выкрасти тайны документы, але стверджено, же не згинул ани оден документ, а натоми́ст злодіи украли сочевку фотографичного апарарата вартости 500 зл.

**Берлин:** Делегация німецка выйхала до

Льондона на засіданє Рады Лигы Народов дня 19 марта т. р.

**Відень:** Италийанске правительство жде на рішенє комісії тринадцетох, котра радит в Женеві в ділі знесеня карательных санкцій.

**Льондон:** Министр загр. Діл Бек был принятый на полгодинной авдыєнції через короля Англіи Едварда VIII.

**Мадрид:** В Испанії иде дальше червеный терор. Каждого дня доходит до кырвавых инцидентов медже политичными противниками. Со всіх сторон краю доносят о рабованю и буреню костелов.



## Вісти с краю.

**Варшава:** Дня 18. марта польска армия перший раз обходила торжественно именины Генерального Инспектора Оружных Сил, генерала дывизии Едварда Рыдз — Смиглого. Со всіх гарнизонов надослано штафеты с пожеланиями для маститого соленизанта.

**Хойницы:** По ограничению желізнодорожного транзита. Німеччина перевозит свои транспорты через Поморє при помочи величезных тягарных самоходов с причепками. Автомобілі тоты виглядають як самоходны поїзды. Такой поїзд перевозит перешло 10.000 кг. тягара. Крім товарных самоходов кувсуют через Поморє также німецькы автобусы особовы. Траса польской дороги выно́сит около 100 км. и єст покрыта асфальтом.

**Новый Санч:** В виду начатя работы при будові дороги Пивнична-Жегестов-Мушина, закрыто колову комуникацію на том пространстві. Плянована єст также дорога: Пивнична-Щавница в цілі колового получения Щавницы и Крыницы.

**Мушина:** Дня 14. марта найдено на штрєці в Мушині убитого лісничого с Поворозника Лещинского. Покойный мал 28 літ, оставил жену, учительку в Поворознику и одну дітину.

**Коло Мушины** напали на господара с По-

ворозника Ендрушак, Хоми́к и Мрожек и побили єго ножами. Суд засудил Ендрушача на 1 рок вязниці, а Хоми́ка и Мрожка на кары по 6 місяцов.

**До Крыницы** приїхал просто с арестов с Нового Санча Адам Малец и закравши ся до дому скарбовых урядников, вошел до комнаты Б. Андерса и начал глядати дачого подходячого. На роботі той прилапал єго Андерс и злодійчик повандровал знова до новосандецкых арестов, где суд засудил єго на 1½ року вязниці.

**Варшава:** Правительство, числячи ся с бідом, яка звичайно выступат найострійше на предновку, перезначило суму оден миллион злотых на докормляне дітей. Гроши тоты розділено уж медже поодынокы повіты. Министр соціальной опе́кы звернул ся с апельом до самоуправных урядов и общества прити с помочом дітям через добру организацию цілой акции и через материяльну поддержку.



## ВЕЛИКА ГОСПОДАРЧА НАРЛАДА

ПРЕДСТАВИТЕЛЕЙ РУСКИХ КООПЕРАТИВОВ И ЧИТАЛЕНЬ С ЦІЛОЙ  
ЛЕМКОВЩИНЫ

отбуде ся в Сяноці  
в неділю, дня 29. марта 1936 р.

о год. 10. рано  
в помещению Руского Народного Дома.  
Обговорюваны будут справы экономичны и культурно-просвітительны.  
Просят о численне прибытьє. Участвовати могут лиш уполномочены делегаты и запрошены гости.

Руский Кооперативный Союз  
в Сяноці.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ  
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

заасекурує ся  
в асекураційном Товаристві  
ВИТА И КРАКОВСКЕ  
во ЛЬВОВІ

Асекурацію принимают на цілой Лемковщині  
представителі: гг. Осиф Яновицкий — Крыница-Село и Михаил Перелом — Сянок.